

丹稜縣志卷六

人物上

鄉賢

宋

李中唐宗室曹王皋之後也臯子偲為武衛大將軍當武氏時棄職入蜀來丹稜伏民間家焉偲五世孫曰瑜明皇幸蜀上表得通屬籍尋拜長江令卒歸葬於丹瑜四世曰遠遠二世曰同為始建令同生全析居華陽為別支而在丹者十數傳至中以進士知仙井監仁厚愛民累遷朝奉大夫卒贈宣奉大夫子二長燾次熹燾自有傳熹官遂寧唐淹邑人字彥通少孤勤苦自奮卒為名儒嘉祐治平間有盛名授經

丹稜縣志卷六

人物上

鄉賢

一

累數百人學者爭宗師之然應進士舉不第龍圖閣直學士益昌陸詵薦於朝不報元祐末不復出遊閉門著書有五經微旨三十卷春秋講義三十卷辨三傳七卷大抵謂春秋有貶無褒於傳注取二三策而已其學博而不雜制行和而不流輕財好施出於自然遇人饑寒推食解衣人有所求則樂衣賣履與之無難色子三瞻庚庾瞻庾祀忠孝祠庾別有傳

唐庚字子西淹仲子善屬文紹聖元年舉進士出宰閬中為政清肅公庭寂然又守綿州有政績州人繪像於思賢堂入為宗子博士張商英薦其才除提舉京畿常平商英罷相庚坐貶安置惠州會赦復官承議郎提舉上清太平宮歸蜀道病卒年五十一為文精密通世務作名治



察言憫俗存舊諸篇時人稱之有眉山集二十四卷收入四庫

[名治論]古者一代之興則有一代之治故曰夏后氏尚忠殷人尚質周人尚文雖聖人之道不可以名言而施之政事必有稱號可指非但王者如此而一國之治亦然故曰周公治魯尚齒而親親太公治齊尚賢而尊尊自是以來謀謨之臣議論之士亦未有不明當世之治體而識其面目者故漢世每以雜霸自名而晉人亦云以道勝寬和為本今宋之為政久矣其所尚者何也士之通經術知古誼者不為不眾日夜講究治道以遊於世者亦不為不熟其所稱引動以宗周為言而問以當代治體則茫然不知所以名之惟無得於此是以有慕於彼愚誠不自揆蓋嘗妄論之矣履不必同要之適足治不必

丹稜縣志卷六

人物上

鄉賢

二

同要之適時故成周之治任人而國朝之治任法任人者非不用法也以人為本而輔之以法任法者非不任人也以法為本而行之以人自古法無全是亦無全非而人之忠佞智愚賢不肖至於遠絕故任法之世無甚利亦無甚害而任人之世非大治則大亂也周時公卿不過數族周召毛原執政至數百載不絕今之大臣更出迭入達者十餘年極矣近者期月而已雖無累世輔弼之利亦無妨賢專志之害矣周之諸侯既錫以土宇則刑賞生殺之柄悉舉以委之今郡縣之權不過鞭朴耳過此以往則相顧而議法矣雖無屏藩形勢之利亦無戰爭侵奪之害矣周時論官必考論人物謂之量才度德今不然矣以資歷為高下以注籍為先後揭闕干道應法者得之雖無

為官擇人之利亦無好惡徇私之害矣周時取士使之自相推擇謂之鄉舉里選今又異於此矣蓋自國初以來三易取士之法然要之不離文字晦名易書暗考而明取之雖無出長入治之利亦無毀譽比周之害矣其大畧如此故周之極熾至於刑措不用四十餘年典章文物之盛信有以絕人而晚節禍敗亦足以稱此國家受命百五六十年間海內晏然如一日者此任人任法之效也昔李勣為將無大勝亦無大敗薛萬徹非大勝即大敗而近世論將未嘗不以英衛為先然則今之所得多於成周亦明矣而士方歎然不足爭說人主以成康之隆而不知國朝規模處置所以成就天下之勢者固已如此非獨不知國朝亦復不知成康矣何則人有情而法無心情之所

丹稜縣志卷六

人物上

鄉賢

三

在恩怨以之其無心者漠然而已今者欲成康乎則必脫畧文法而一切任人夫以天下之大利而索之於繩墨之內是猶以李勣之節制而求萬徹之奇勝終不可冀然與其蹈萬徹之險孰若李勣之持重足任也哉

察言論古之人臣抵掌緩頰說人主以用兵者其言

未嘗不引義慷慨豪健俊偉使聽者踴躍激發奮然而從之至考論其心則有為國計者有為身謀者是不可以不察也今夫戰則除害於時不戰則貽禍於後此有必勝之機彼有必敗之道思慮深熟利害之形了然於胸中知其決不誤國而後為之若此者為國計非身謀也張華裴度是已天下既平謀臣宿將以侯就第杜門却掃無所用其奇則瞑目扼腕爭為用兵之說庶幾有以騁其智勇而舒其意

氣若此者為身謀非國計也臧宮馬武是已國家無事貪財嗜利之臣無所僥倖則必鼓倡兵端以求其所欲兵革一動則金錢貨幣玉帛子女何求而不得若此者為身謀非國計也陳湯甘延壽是已官崇祿厚無所羨慕惴惴然惟恐一日失勢而不得保其所有則必建開邊之議以中人主之欲以久其權若此者為身謀非國計也楊國忠是已前侯故將失職之臣負罪憂畏思有以撼動其君則爭議邊功以希復進若此者為身謀非國計也竇憲是已古之人臣逆節已萌而功效未著人心未服則未嘗不因戰伐之功以收天下之望若此者為身謀非國計也桓溫劉裕是已嗟乎秦漢以來說人主以用兵者多矣或勝或不勝要之為國計者至少為身謀者如此其多也

丹稜縣志卷六

人物上

鄉賢

四

可不鑒哉可不戒哉 [呂榮義撰唐子西先生文集序] 近世以文集顯於時者文忠公有六一居士集舒王有臨川先生集參政呂公有觀文集丞相張公有乖崖居士集蓋其文如是其官如是雖樵夫野老市井庸人皆能道其姓氏而樂誦之故言之易以信而傳之易以廣其勢然也乃若有其官而文不顯有其文而官不顯二者不可兼故其傳之誠難若唐先生者所謂有其文而官不顯者也先生名庾字子西眉山丹稜人也紹聖中以進士第為州縣官至大觀始入為博士士大夫稍道其文而世亦未盡知之政和初謫居海表流離困苦蓋六年而不返然身益窮而文益富也其後歸京師僦居於景德寺予時與先生比舍而日得見先生之所為文頗多嘗請其本以傳

而先生辭曰余以是得名亦以是得謗可一覽而足何必勻而去也於是乎不果傳焉退復思念曰先生之文金玉也雖閉藏埋沒不求人知然氣焰光彩久而必見於世蓋所謂不待言而後顯也已昔屈原以離騷顯陶潛以歸去來辭顯盧仝以茶歌顯顧當時達官豈無其人而三子獨得顯於世豈非以其文乎今先生之文余知其不久而遂顯也先生死不一年果有彙其文以來京師者而太學之士日傳千百本而未已然惜其所傳者只此今始序而藏之庶幾他日必有得其完本者宣和四年八月十五日序

病鶴行鶴兮鶴兮何處來

秋江靜兮蘆花開波浪浸月白皚皚千聲萬聲鳴哀哀不飛不翔不飲啄骨稜稜瘦如削冰姿玉質僅生存雪羽霜毛半零落鶴兮鶴兮何鬱鬱我知爾是冲天物芝田養就孤高情瑤池洗出神仙骨傳聞仙島冥冥中水晶甃作蓬萊宮祥烟瑞霧常濛濛好將六翮搏天風

丹稜縣志卷六

人物上

鄉賢

五

楊恂字信仲邑人登神宗五年進士第知廣都縣哲宗三年日食求直言與眉山家愿上書論時政甚切直越三年同入黨籍邪下第五等其書以大不存同時邑有劉氏者亦以上書第邪等

魏了翁元符忠諫堂記予歸自靖仲矣謂曰先人之敝廬則忠諫之故址也詩云維桑與梓必恭敬止我將以忠諫名吾閣子為我記之予慨然有感於世道之變人情之反乃至若此且曰姦曰邪名之至尊王法所必誅也人之於先祖為銘物為丞彝鼎為壙誌稱美而不

稱惡今崇甯用事之臣籍其祖於邪等附其事於姦黨而子孫矜以
為榮名實不已戾乎夫名之必可言言之必可行未嘗有無實之名
也故聖賢之言名必與實對周哀始有名與實戾者名之君而實不
君名之臣而實不臣以至不父不子不兄不弟不夫不婦無時無之
夫既名浮於實則於是有名實之說逮其又甚則放辭者盜邱非軻
矣嫉世者溷夷廉跖矣至楚人則白可黑上可下至秦人則鹿可馬
黑可黃至漢則鷓鴣可鳳至隋則野鳥可鸞然而以格人元非為姦
邪播之詔令勒之金石書之史冊不忌不疑如京下之為則未之見
雖東漢嘗以黨人錮士大夫唐季牛李相傾相軋不極於亂不已固
未嘗被以溢惡無實之名也自京下一開其端變亂黑白實為陰乘

陽賤陵貴夷亂華之兆至於秦檜習非效尤遂取張胡李趙之所引
用者加以叛逆之名株連逮繫五十三家將以為截韓侂胄柄國則
又以附於趙忠定公者謂之逆黨學於朱文公者名之偽黨夫曰姦
曰邪曰逆曰偽本以怖而携之也而願附名籍者惟恐後則是古者
至不美之名在近世反為至美之事况夫元祐元符著籍之士蓋皎
然如天日之清明庸夫孺子裔夷醜虜孰不知之今蒙以甚惡之名
在諸賢無毫髮加損也祇以貽千載之一喙耳

楊明字子微邑人篤學有文知術數讀書城東龜山遂自號龜山登崇
寧進士第官朝請郎知合州以清節著子煒通敏能文官修職郎
劉提忠介公汲之弟第進士以通仕即行蜀州晉陽尉提兄弟少孤遵

母徐夫人教甚力先後成名顯於時鄉里重之唐庚誅其夫人曰大兒來歸里門下車小兒來歸擁板以趨宦學成矣繫爾母且孫道夫字太冲邑人貢辟雍時禁元祐學坐收蘇氏文除籍再貢入優等以張浚薦召對道夫奏願修德以回天意定都以繫人心任賢才圖興復以雪國恥上在越浚遣道夫奏事賜出身改左承奉即再召對言漢中前瞰三秦後蔽巴蜀孔明蔣琬出圖闕輔未有不屯漢中者今欲進兵陝西當先經營漢中荆南東連吳會北通漢沔號用武之國晉宋以來嘗倚為重鎮今守江當先措置江南時至則蜀漢師出秦關荆楚師出宛洛陛下親御六軍由淮甸與諸將會咸陽孰能禦之召試館職上諭宰相自渡江以來文氣未有如道夫者除秘書正字權禮部郎官

丹稜縣志卷六

人物上

鄉賢

七

尋權左司員外郎遷校書郎出知懷安軍乞罷都運司以寬民力罷戍兵以弭亂階罷泛使以省浮費知資州宣撫鄭剛中薦其治行第一移知蜀中盜不敢入境遇事明了人不能欺九年不遷蓋非秦檜所樂後以吏部郎中入對言蜀民二稅鹽酒茶額之弊上納其言除太常少卿假禮部侍郎充金正使金欲敗盟詰秦檜存亡及闕陝買馬非約道夫隨事折之使還擢禮部侍郎兼侍講奏敵人有窺江淮意上曰朝廷待之甚厚彼以何名為兵端道夫曰金人身弑其父兄而奪之位興兵豈問有名臣願預為之圖宰相沈該不以為慮道夫每對輒言武事該疑其引用張浚忌之道夫不自安請除知綿州致仕卒年六十六道夫居官一意為民不可干以私仕宦三十年俸給惟置書籍性剛直喜面折

不容人短或以此少之
程掌字叔運邑人豪俊明辯紹興三年廷試第一歷洋州觀察判官徒
步杖策謁真德秀於浦城議論時事皆中機宜著有雲歸鼓吹自由編
等書行世

唐文若字立夫庚之子少英邁不羣為文豪健登進士第分教潼川府
以給事中勾濤薦詔赴行在既至濤出不得見文若奏書闕下畧曰昔
漢高慢士四皓去之而西都少庶恥之人先武禮賢嚴光友之而東都
多節義之士陛下屈萬乘之尊駐蹕東南兩宮將歸五路初復正宜市
朽骨式怒蛙以來豪傑與之共治寧遂惜此數刻之對耶書奏召對改
令入官通判洋州再判遂寧府會大水民多漂死文若發庫錢募游者

丹棱縣志卷六

人物上

鄉賢

八

極活甚眾請於朝除田租二萬一千頃免場務稅二十餘所築長堤捍
水自是無水患秦檜死上訪士於魏良臣以文若對二十六年以光祿
寺丞召改秘書郎為文思箴畧曰於赫我皇兵既休矣兵休何如莫如
治兵凡千五百言自檜主和朝論諱言兵故文若以此諷焉遷起居郎
勸上收用西北人材以固根本上深納之將命掌制會有為宣和執政
請恩者為司諫凌哲所彈文若嘉其直作禾黍詩美之被劾出知邵州
上屢為近臣言文若無罪可改近郡知饒州興學宮減田租奇耗二萬
石又請糶常平義倉之粟十之三與民平市農末俱利而粟不腐遂著
為令餘十有劇盜巡役不能制遣牙兵捕而戮之加直敷文閣移知溫
州召為宗正少卿除起居郎時諸將北出提書日聞上下有祖志獨文

若憂之圖上元嘉北伐故事曰願陛下深察大勢趨策之長而避其短無循前代軌轍則大善以起居郎兼給事中直學士院遷中書舍人上將內禪前數日手詔追崇皇太子所生父文若既書黃因過周必大通聖德而疑名稱未安歸白宰相請更黃堂吏不可文若執不已宰相以間詔改稱本生親其後詔稱皇兄孝宗嗣位文若以疾請外除敷文閣待制知漢州復知鼎州改江州金人大入官軍悉戍淮文若謂上流當嚴兵備以定民志奏籍鄉丁五萬訓練有法人倚以固旋請祠章三上未報乾道元年卒年六十贈左通奉大夫著遯菴文集三十卷

樊漢炳邑人紹興進士歷官尚書以才望顯許奕有詩題墓所謂高志崢嶸局九州也著有南賓志序

丹稜縣志卷六

人物上

鄉賢

九

李濤字仁甫性剛大特立獨行甫冠憤金鑿未報著反正議十四篇皆救時大務紹興八年第進士調華陽尉再調雅州推官改秩知雙流遷知榮州除潼川府路轉運判官乾道三年召對首舉藝祖治身治家治官治吏典故以為恢復之法乞增置諫官許六察言事請練兵無增兵杜諸將私獻覈軍中虛籍除兵部員外兼禮部郎中初燾恥讀王氏書獨博極載籍搜羅百氏慨然以史自任本朝典故尤悉力研覈倣司馬先資治通鑑例斷自建隆迄於靖康為編年一書名曰長編仍效光體為百官公卿表史官以聞詔給筆札來上四年上之自建隆至治平凡一百八卷五年遷秘書少監兼權起居舍人尋兼實錄院檢討官八年直寶文閣帥潼川兼知瀘州淳熙元年除江西運副臨遣奏日食地震

皆陰盛主敵國小人不可不慮累遷禮部侍郎以雷震建言上嘉其謹
直賜金紫駕幸太學燾論兩學釋奠從祀孔子當升范仲淹司馬光蘇
軾歐陽修黜王安石父子從祀拜侍即仍兼工部七年長編全書成上
之詔藏秘閣燾自謂此書寧失之繁無失之畧故一祖八宗之事凡九
百七十八卷總目五卷依照寧修三經例損益修換四千四百餘事帝
謂其書無愧司馬光一日召對延和殿講臣方讀陸贄奏議燾因舉贄
所言可行於今者數十事勸上行之進敷文閣學士兼侍講同修國史
嘗宣對燾言外議陛下多服藥罕御殿宮嬪進見無時浮費頗多上嘉
其忠謹以十一月日當食條上古今日食是月者三十四事奏曰方潛
陽時陰氣乘之故比他食為重非小人害政即敵人窺中國明日召對

丹稜縣志卷六

人物上

鄉賢

十

延和殿又及晉何曾譏武帝無經國遠圖十一年春乞致仕不允病革
口占遺表願經遠以藝祖為師用人以昭陵為則乃卒年七十贈光祿
大夫謚文簡張栻嘗曰李仁甫如霜松雪柏信不誣也著有易學五卷
周易古經八篇尚書大傳雜說一卷尚書百篇圖一卷詩譜三卷春秋
學十卷五經傳授圖一卷說文解字五音韻譜十卷續資治通鑑長編
五百二十卷清光緒七年經浙江巡撫譚鍾麟重刊板存浙江書局舉要六十八卷續宋編年資
治通鑑十八卷紹興日歷一千卷重修徽宗實錄二百卷考異二十五
卷目錄二十五卷四朝史稿五十卷思陵大事記三十六卷阜陵大事
記二卷建隆遺事辨一卷諭西南夷事一卷巽崖奏議四十卷七十二
子名籍一卷陶潛新傳三卷趙普別傳一卷李昉等十事一卷淳熙四

繫錄二十卷記女貞契丹起滅七十二候圖一卷江左方鎮年表十六卷晉司馬本支齊梁本支王謝世表唐宰相譜五代將帥年表歷代宰相年表三十四卷天禧以來御史年表諫官表續皇朝百官公卿表一百二十卷本朝事始二卷科場沿革一卷宋政錄十卷集賢學士拜賜帶典故一卷六朝通鑑博議十卷通論十卷文簡公集一百二十卷〔朱彝尊書通鑑長編後〕丹稜李文簡公續資治通鑑共九百八十卷舉要六十八卷目錄二十五卷計一十七十三卷今僅存者太祖至英宗朝一百七十五卷而已若神宗朝二百二十八卷哲宗朝二百二十卷徽欽二宗朝三百二十三卷乾道中祇降秘書省依通鑑紙樣繕寫一部未經鏤板遂失傳宋儒史學以文簡為第一蓋自司馬

丹稜縣志卷六

人物上

鄉賢

十一

君實歐陽永叔書成猶有非之者獨文簡免於譏駁張敬夫比之霜松雪柏生死文字間葉正則謂春秋之後纔有此書要非過論也治平以後藉有長編紀事本末存畧見大旨然見之者罕矣陳氏極王氏宗沐薛氏應旂目不睹是書輒續通鑑行世柯氏維騏王氏維儉之改修宋史亦然此猶夏蟲不可語以冰松柏之鼠不可語以堂密之有美樅者也〔成都學舍遺興詩〕久客墮塵土幽居懷翠微只餘清夜夢長作故山歸菊已開三徑松應長十圍晨鐘忽驚覺猶有露沾衣〔題南部停雲崖〕路轉層岡二里餘武陵傳者亦難如昔年煉藥仙人室今日餐霞道士居洞外蟠桃開錦繡崖前丹溜漱瓊琚猗與靈氣為時雨可惜圖經缺不書

李燾燾弟知遂寧治民寬厚凡無名之賦悉奏蠲免不愧其父兄焉
宇文价邑人登進士第官給事中與李燾同朝遇事敢言孝宗嘗召對
謂有古直臣風燾病上遣价傳旨問病增損燾因叩時事勉以忠蓋
李燾燾次子字仲信試賢良方正直言極諫科登第燾嘗謂唐三百年
惟劉去華不愧此科心慕之命二子燾塾習焉吏部尚書汪應辰薦燾
文行可應詔故有是命燾中制科為秘書省正字遷著作郎兼國史實
錄院編修官父子同為柱史搢紳榮之

李壁字季章燾子少英悟日誦萬餘言屬辭精博周必大見其文異之
曰謫仙才也燾自舉於孝宗以為可用初蔭入官第進士召試正字寧
宗徙著作郎權禮部侍郎兼直學士院與尚書受命使金披露肝膽以

丹稜縣志卷六

人物上

鄉賢

十二

釋金人之疑侂冑銳意出師壁入奏云自秦檜倡和使父兄百世之仇
不復開於臣子之口今廟謀未定士氣浸衰苟非激昂曷丕應臣愚
以為宜急貶秦檜示天下必報國仇之意疏奏秦檜坐貶追王爵侂冑
命葉適草出師詔不從乃屬壁其畧云天道好還中國有必伸之理人
心效順匹夫無不報之讐含垢納汚在人情而已極聲罪致討屬彼運
之將傾兵出有名師直為壯言乎遠言乎邇孰無忠義之心為人子為
人臣當念祖宗之憤由是拜禮部尚書參知政事尋拜端明殿學士知
遂寧傳檄諭降潰兵張福適官軍挑戰賊忿播城壁召張威來會威欲
乘夜大攻壁不可曰攻則多殺士卒授長圍法斷賊汲路糧道賊遂平
引疾奉祠卒贈資政殿學士謚文懿著有雁湖集一百卷清塵錄三卷

中興戰功錄三卷中興諸臣奏議四百五十卷內外制二十卷南北攻守錄五十八卷援毫錄八十卷臨汝聞書一百五十卷王荆公詩註五十卷父壽弟皇皆以文學知名蜀人比之三蘇

〔題東山精舍〕

彭山虞允文讀書處

木落天清遠嶺多水平烟盡鏡新磨周公謝

傅皆塵土病鶴間來借一柯

〔題青神慈老崖〕洗盡一春歌酒塵蒼

江吹破碧粼粼繁華過眼都如夢祇有三峯是故人

李皇字季華壽少子幼聰慧舉口成詞壽撫之曰是免千里駒登淳熙進士入館職文聲赫然班對備陳忠謹慶元中出知夔州愛民惠士不墜家風為沅江制置副使開閩於鄂甚得江漢心嘗有請復五關之險疏畧云虎頭關形勢最險兩山千仞一澗激衝黃土關形勢聳峭白沙

丹稜縣志卷六

人物上

鄉賢

一三

關與黃土相去密邇木陵關山路峭壁委折而上大成關山勢不甚高峻而橫斜盤繞修善關亦在其旁使諸關之兵據險效死敵豈能遽入乎時以為確論入為禮部尚書資政殿學士奏請以周程朱張從祀孔廟而黜王安石配享上從之嘉熙元年同知樞密院事宣撫四川奏蜀漸次收復然創殘之餘撫綏為急宜降德音釋見繫囚貸流民牛種淮西被兵之處亦如之二年四月癸未晉簽書樞密院事督視江淮荆湖兵馬六月卒謚文肅所著有悅齋集固陵錄公侯守宰士庶通禮三十卷十朝綱要趙鼎行狀三卷續補漢官儀一卷續帝學一卷

〔端平二年賜皇請歸田不允詔〕朕始躬萬幾靡遑他務廸籲耆俊共圖康功卿作我恭先為時特起言論有偉聰明未衰而陳誼再三繩

以禮律朕惟七十而致君事特其大閑耳若者耄好禮耄期稱道有不得謝則不以齒為限也書不云乎罔或者壽俊在厥服予則罔克尚安厥位毋駿爾行 [撰鄂州重修北榭記] 鄂渚之勝以南樓北榭并稱南樓繇元祐改作元符末黃公魯直嘗見於題詠惟北榭冠了城之巔在郡公堂之後不知自何時建立乾道中于湖張安國為大書榜其門厥後達官名人稍有為賦詩者然距今亦五十餘載矣棟宇隘卑日就地廢莫或顧者一夕大風震蕩摧屋山飄瓦如墜葉舞空屋隨傾壓不可復支了城亦久弗治土石墮地榛莽蒙翳狐狸所窟虺蜴所蟠於是妨議更葺先增壁北隅袤二尋崇三丈有奇南袤尋有半崇與北等遂改建北榭屋闢而大之敗楹腐桷悉易以新既

丹稜縣志卷六

人物上

鄉賢

一四

成宏敞翬翼與南樓巖然相望始於一郡面勢為稱雖其高無所不矚而北望為尤宜嘗試相與憑檻遐睎則烟沙蒼茫天水無際西陵郢杜安陵諸所隱隱出沒雲外雲夢之泱泱漢沔之滢洄皆可目畧而指喻羣鴻匹鶴嬉翔上下平蕪斷浦杳杳如髮暇日徜徉不陟級數十武而坐得千里絕特之觀殆前所未有也惟漢江夏太守所統疆域至遠今光黃蘄安信九郡之地皆故屬邑春秋時吳楚交戰出師往來之地水如清發湏澁山如內方大小別雖邱邑變遷而勢勝猶在與夫孫伯符之所討擊周公瑾之所摧敗陶士行之所平殄其遺跡猶可諏訪而考求邾城臨江故堞宛然嘗筴其規模特淺淺耳庾元規志驕才輕亦弗克有成三關九阨之塞魏梁交攻或得或棄

弱強係焉以見昔人爭勝之力不為無意夫以地之相距雖有數百里之遠而據其要會實皆在吾環顧規置卷舒伸縮之中况郡居全楚上游與江陵襄陽實相為表裏諸葛忠武嘗欲舉荊州之軍以出宛洛公瑾亦謂據襄陽以蹴操北方可圖二人之言若合符節而宋何尚之顧言夏口當荆江之中直通雍梁實為津要豈非以地勢便兵力接故耶抑嘗據此論之若昔自南而圖北則易為功自北而入南則難為力故梁末因陸法和之敗郡雖暫屬高齊慕容儼死守半歲雖能拒退侯瑱等然卒棄之還南五季杜洪襲據州城遙附朱梁以扞淮南之侵朱梁三遣兵援之皆至近地然無救於洪沆為淮南將劉存所克身隕國絕豈天塹之設果足以限南北耶抑或彼或此

丹稜縣志卷六

人物上

鄉賢

一五

存乎人之圖畫智畧如何耳夫惟俊傑之士有志於當世要必討論之素精計慮之素熟異時行游坐息朝夕思維未嘗不在於此故一旦發而見諸施為則必卓偉絕人非臨事隨應率意而為之者所可及傳曰登高能賦可以為大夫趙孟至鄭請七子皆賦以觀其志夫所為能賦者豈徒能吟咏一時之風物景色哉必也升高而望遠憂深而謀長覽山川之形勝考古今之成敗究昔人謨議之得失與今日時措之感宜其所蓄積操存因感觸而發見所賦之志於是乎在王茂宏新亭之感逸少冶城之諷大較亦茲意也夫是則高明其居處緬邈其臨眺豈但以逸其一身而自適於耳目之間而已哉櫟之廢興以未足書然余改作之意非遊觀之為則不可不明著以貽後

之同志者俾得以周覽而緝思焉嘉定甲申三月丙午記 [魚復] 扞
關銘維梁州域神禹所別有巋其闡險肇天設控引荆襄枕倚牂越
岡連嶺屬崕呀巖巖洪流下瞰澎滲蕩瀟衡瀾抗高華岱媿築上柱
天倪旁扼日轄惟所屏障則恃於峽如戶斯闢此為之闡寇來是扞
兵勢攸接鏡考前古棋勢輻裂水攻陸擊岩披谷抉屏甲燿燦白刃
鎗鐵雲何倏馳羽燾斯揭山犇羆兕壑潰螭蛻水姦脫入孰晚旋竊
虐環千里炖人於鑣曾不踰時宗隕祚拔四方之人王化所達寧甘
嗜亂實首攸脅豈富是怙忍上之缺惟此山川重阻複疊德守者固
兵據者蹶惟此黔庶巖巖業業力制則離道懷乃協皇帝聖武恩被
穢穢國有至仁九土臣妾勒銘山阿永彰宋烈 [王已從史巫山後

丹稜縣志卷六

人物上

鄉賢

一六

飲江皋風沙一夜捲冥冥曉夜瞳矇上翠屏薄宦驅人成老大佳時
得酒慰飄零紅餘晚樹迷幽谷綠漲晴波失遠汀却是崇山兼峻嶺
看來渾不減蘭亭 [巫山晚泊棹石灘詩] 黃昏風雨阻江濱翠綰羣
峰暮色勻一夜子規啼到曉孤舟愁煞未歸人 封崇嶺上細腰宮
遺老相傳祭鬻熊一炬牧兒今指處年年青草長春風 陽臺門對
天律山女郎吹笛翠微間日斜酒散同歸去笑插花枝滿鬢鬢

明

宋文翼字怒飛邑人明末貢太學大司成器重之授蜀藩長史甲申賊
隘京師蜀省戒嚴巡撫陳士奇巡按劉之渤以文翼有經濟才使監軍
事運籌糧餉守禦有方人心安定後獻賊陷成都入山遯跡不復出以

節操著年八十卒

清

彭萬崑字玉吾明末人慷慨有大志以濟困扶危為己任歲旱貸粟於鄰人朱翁翁善鑑奇之曰逆宦擅權盜賊擾亂能捍此方患者必君也指困粟遺之甲申之變萬崑團鄉勇禦防盜不敢近獻逆遣假子劉文秀屠川南營丹邑城外萬崑歎賊覘動靜與健勇七人俱裹甲藏刀牛酒至營賊橫戈豎矛刀劍交加光寒射目從人股慄失色萬崑意氣自若賊詰來意語未畢從人刀墮地鏗然叱縛帳下詰以故舌強不能答萬崑從旁應曰某等路防盜劫藏刀自衛無他意也且某僅八人何能為賊釋之遂歸暗據要隘為備賊旋去當是時丹東南北諸村殘害幾

丹稜縣志卷六

人物上

鄉賢

一七

盡獨其鄉安堵如故邑中避賊者多歸焉大軍既誅獻賊其黨赫通志

并作赫績志作郝誤

承裔據黎雅叛由青衣江破洪雅夾江下嘉陽制軍李國英

問軍中誰能探賊虛實者或舉萬崑張應試召詢之因請大軍揚言出邛而以奇兵襲之傳言賊喜僧遣幹僕削髮易衣潛探路還報制軍分兵兩道尅期暗應使前軍佯敗賊悉眾來奇兵突入豎旗鳴鼓火其巢夾擊之斬赫承裔餘遂降制軍給以都督僉事劉付辭不受遭賊亂人不得耕大旱斗米數千錢萬崑設粥廠於通衢就食者日益眾又擇膏腴地種芋及黍稗可食之物以繼之三年全活甚眾年八十八卒累贈懷遠將軍祀鄉賢祠

張應試字玉環定寅曾孫丹稜之鄉人也負文武姿才情邁眾膽畧過

人鄉人咸推重之與彭萬崑中表甚相莫逆及獻賊據蜀遣賊將劉文秀屠丹二人各聚鄉勇數百保障一方賊不敢近後見賊屠三月無去志乃備牛酒託犒軍欲圖刺賊因從人刀墜賊覺不果行辨得免禍歸誓鄉勇嚴防備賊令數人入境應試擒而殲之賊怒再令三百餘人復來仍以埋伏法盡擒之而殺於三溪口賊懼乃徙雅州鄉里賴以保全聲名大震繼復以計破賊與萬崑俱加都督僉事尋授奉直大夫卒祀鄉賢祠

彭忠字亮工沈靜寡言有才畧多智謀內遭家變鄉棍利其財釀成大獄父母年耄恐驚怖密不以聞乃多方籌畫令弟珣任其事而陰調劑其間延二載方以理直勝是時家業頗饒有田三百頃僮僕數百人與

丹稜縣志卷六

人物上

鄉賢

一八

弟珣曰諸奴利吾財耳不計將復為患於是散其田於宗族鄉鄰間幾半其僮僕願去者遣之不去者聽自此人鮮覬覦心歷數十年無纖介禍于姪等好嬉戲日錄盛唐詩數章或古書一則令誦之咳以棗栗其獎誘後進如此少多病父母憐之不欲強以書然好學不倦當是時吾川兵燹後老師宿儒殘滅已盡丹稜地處偏隅無師友可資乃日夕刻厲為文章不肯俯仰隨俗與諸生朋試於有司必冠其曹屢困棘闈以明經老年六十卒

彭璋忠弟字奉君少有大志為諸生無以異人乃痛自刻勵虛懷善下同時洪雅文百朋負盛譽家貧常負戴行適應試嘉州遇中途詢及姓字大驚因解所乘馬乘之而自乘家人馬令步行數日接之甚恭文訝

曰素未識君不知何以見厚若此璋曰重公名耳因出篋中文一卷相質文畧不推讓一一指其得失於是悅甚遂訂交復從王君崧遊討論文章源流及古今成敗蘊蓄既深文日有名向所與朋試者皆遠出其下丙子舉於鄉兩試禮闈不利不得已就教成都保縣保縣蠻邑也衣冠語言迥與外異及至教以禮讓并誘之學人爭化之忠州貢生何淮者為州人所不容州牧追捕甚急潛依璋或謂曰此人當遣去恐生變璋憫其窮不聽試以文能甚因令閉戶讀書毋他出是歲康熙癸巳恩科何無結不得試璋結之竟舉第一人蜀中人士聞而慕之願出其門者比比矣未幾以薦舉授雲南富民令兼署新興州篆前牧任新遭民變疑為孝廉某昆弟所使欲迫致之獄璋力白其誣事乃寢二年丁母

丹稜縣志卷六

人物上

鄉賢

一九

報服闋補福建南靖令明斷有聲上官嘉其能俾兼攝龍溪海澄諸縣事未幾病卒年六十四未得竟其用論者惜之子六人皆好武一咸進士四舉於鄉諸孫登科甲者七人多顯宦人以為隱德之報

彭珣字東璧少聰敏有幹畧為諸生一以通經學古為高其文章尚簡樸不諧於俗年三十遂絕意進取洒然有四方之志於是遊滇黔及吳越齊魯燕趙間數年倦而歸遁跡於三溪之濱布衣蔬食宴如也邑侯聞而賢之有公事多諮訪而後行平居信義服人鄉人有爭者質於前立剖曲直咸悅服去其黠者或拂然怒婉語之曰汝試鳴諸官將必然已果然於是相與呼為神君而排難解紛無寧日先世遺業頗饒悉付家人不問里有侵其田者詰之反怒而相訟詞屈始還珣笑曰是窶人

子吾何忍奪之但欲使伊知耳其居心之厚類如此晚年潛心於易採集古注自馬鄭荀王而下數十家錄其精者以教諸子而推王輔嗣為四聖功臣年六十五以明經終學者稱為三溪先生其无璋嘗語人曰有才如珣不應屈首草澤然觀其諸子皆賢而好學或亦天將以啓其後歟

彭端淑字儀一號樂齋幼而穎異十歲能文雍正丙午登賢書癸丑成進士授吏部主事姪雅宏通湛深經術與弟肇洙遵四俱以文章知名時稱三彭往來贈答皆南北知名士如蔡寅斗胡天游竇光鼐等咸推重之乙丑升本部員外郎尋遷文選司郎中乙亥擢廣東肇羅道以清慎自矢凡巡邊及盤察騶從不過一二人所至禁州縣迎送察吏胥極

丹稜縣志卷六

人物上

鄉賢

二。

嚴契憑絕民間有不便處務更正使之相安省中積案三千餘件制府委之審理不恃擊斷之能開誠布公不逾月積案俱清寮屬皆服其明決修省城書院延明師月課親為指授士風丕振督粵西糧運舟行海隅失足墮水如有物負之脫於險告歸主錦江講席造士无眾待人接物和平樂易年八十一卒著有白鶴堂詩文稿四卷蜀名家詩抄二卷曹植以下八家詩選若干卷粵西紀草一卷雪夜詩談二卷

〔老蘇瑞蓮池記〕丹稜屬眉山余自束髮讀蘇氏文集慨然想慕其人適眉訪昔日遺址得於城西南隅古柏千尺遺像森然流連不忍去其側有池池内有蓮或曰此國文公手澤所存也夏秋之交不常開開則為吾眉科名之應自明以來厯驗皆然因共傳為瑞蓮池夫先

生去今日五百餘年其文章流播常有英英不可磨滅之氣至於蓮亦偶寄耳人遙世變幾經殘燬而不移亦已異矣乃復為瑞於眉我余嘗自蜀之秦之豫之齊及吳越楚粵遊羅浮過惠州所至有東坡祠或其所嘗遊及謫居之處每歎賢人君子於其所至奕世而下雖山川草木亦與有榮況其所生之地手澤所存之足以為瑞也耶後之君子因蓮而生慕因慕而生奮使古人流風或復見於今日也是則余之望也夫

【書蜀碧後】蜀碧者哭蜀也哭蜀者所以著楊嗣昌之罪而憫邵捷春之愚以弔忠魂烈魄於地下也蜀之險甲天下扼其要塞雖百萬可立挫焉是以獻賊一寇夔門而秦良玉困之向非以賂陳奇瑜脫去則賊之亡久矣嗣昌委蜀於賊夫人知之而捷春

丹稜縣志卷六

人物上

鄉賢

二一

不知也撤夔萬之藩籬守重慶之門戶使賊得出入縱橫而無所忌此其罪在誰哉故曰哭蜀者所以著楊嗣昌之罪而憫邵捷春之愚也獻賊之三入蜀也分道屠戮流血成川蜀之慘極矣當是時自縊紳以至氓庶盡節者不可勝數而閨中婦女或閉戶自焚罵賊以死者無算戎馬倥傯其事不必盡傳傳者莫由表述筆之於書使後之君子得以考之則死者可以無憾曩嘗論其大畧特未暇詳今余弟磨泉採擇成編題曰蜀碧是固余之志也嗚呼蜀非有深怨積怒於賊也而殘忍若此天實為之耶抑人事使然耶覽是集者必將有歎息泣下而不能已者故曰蜀碧者哭蜀也

【題漢將軍嚴顏廟詩】遜跡煙霞外殘碑烈燭紅師興勞蜀相凱奏隱嚴公汗馬飲泉碧鞬弓

掛壁空危橋翠嶂入荒徑綠苔通雲鎖堂基舊山環氣勢雄登臨追
往事千載慕高風 〔過大佛崖詩〕百丈凌雲上三江滙足流波濤長
在眼風雨幾經秋曲徑迷行跡蒼苔點客舟舟行倏已遠回首別嘉
州 〔望諸葛武侯墓〕才如管樂吾何羨心似伊周孰與倫已向隆中
據大策敢辭強寇惜微身寒原古木驚風雨夜月空山泣鬼神駐馬
荒郊遙極目忠魂千載漢江濱 〔戲馬臺懷古〕君不見彭城城邊戲
馬臺殘碑斷碣長莓苔又不見破秦救趙天地震當年意氣何雄哉
一著錦衣鄉國還隆準東向扼函關悲歌帳底美人死驕驍無聲鞭
不起 〔杜鵑行〕有鳥有鳥古帝魄事去千年悲故國深山夜月一聲
啼天地有春留不得今古世事如蒼狗王侯蠅蟻同枯朽試看蠶叢

丹稜縣志卷六

人物上

鄉賢

二二

開國來金牛貢罷非昔有胡為歲歲啼不住似含孤憤爭自訴勸君
切莫近青樓樓上落花如紅雨

彭肇洙字仲尹與端淑為學生兄弟雍正癸丑同第進士由刑部主事
遷河南道監察御史嚴正不阿遇事敢言尤博雅文名噪一時著有撫
松亭遺編二卷竹牕巽言二卷

〔丹溪遺編序〕磬泉學富才充好著述拙於字不能自繕其本篋中所
藏如江濤峽猿等彙皆闕蜀中文獻而以零章雜沓墨蹟蒙翳難卒
讀當官吳楚時力可以備書家方氣浩心雄冀晚年歸里始考訂以
行世竟不知年歲之促與時之不可失也故其所傳者惟蜀碧縣志
二書嗟乎才者造物所忌數十年而得一小才人千百年而後得一

大才人是人者必使之困窮阨塞以死或稍舒其志矣則沉之雜僚下吏不則遷謫流離以死所以然者天地亙古不息人才實乘之造物必不肯以千億萬年之世宙洩之一代更不肯以千億萬年之人心思洩之一人苟有可觀而芙蓉京兆之命旋下冥漠中矣磬泉歿後越七年餘仲兄樂齋自嶺南解組歸始叩其三子延慶得其首尾完備者詩文數十篇嗚呼磬泉其竟以此而已乎昔歐陽文忠公亟稱鄭條古文無隻字為後人見坡公詩云文章豈在多一頌了伯倫磬泉蜀碧海內傳之矣縣志亦為當路所賞云乾隆二十七年六月叔兄肇洙弁

撰張孝子傳

孝子曰華張氏洪雅徐村人六世祖

鵬前明顧鼎臣榜進士代次膠庠日華生二歲而孤性懇摯依母不

丹稜縣志卷六

人物上

鄉賢

二三

稍離獻賊入蜀兵四起狄三品據眉州掠旁縣及洪日華甫十歲與兄日熾就家塾為抄兵邏去母子遂遠絕日華入營分左標章臣隸思母日夜啼不食時同虜百餘人及兄多方慰之不聽章臣妻董氏聞狀慰之曰爾思母有爾方有母爾不食胡能生爾且不有誰見母飲食吾爾歸矣日華喜而躍後食自後盼顧異他虜移營兄日熾不知所在從此去建昌中歷福建廣西貴州駐雲南日華外謹順私斷酒肉祈早見母人無知者歲且三十矣是年章臣攻水西寨日華隨乘不意擒其將服則釋之酋為感泣康熙四年移駐湖廣蘄州楚蜀接壤過江達故土便於滇黔日華念主將恩又不知母存亡久之會赴川南回者得母生耗旋束身盡擲橐中所有留謝主人由陸披星

走荆門彝陵蔓萬萬山中踵蘭趾裂蕩如也雨越月抵家母子再聚
其時康熙十年約虜迄歸在外十九年初日華在雲南同營娶婦利
具年少屢以終身托日華舉初誓生不見母不娶轉加禮如兄嫂
感咏柏舟以終而蜀當兵燹後腥疫流行日華歸親友物故盡始營
家計娶妻生子延張氏脈疊奠堂兄嫂姪六喪撫族孫外戚孤婚配
家不豐喜周急如解衣衣里人表達高蕭鳳鰲獨佃欠陳君德等租
百石在湖廣有貸金無償者議鬻婢子曰華隨焚其券其生平好義
輕財多類此閭里中稱為孝子或呼善人而不名康熙十九年母病
劇藥罔效日華割股進之應愈後母沒廬塚側三年每念母當亂離
時賴野蔬得全絕葷終身焉 撫松亭曰卓哉心乎心在江河不能

丹稜縣志卷六

人物上

鄉賢

二四

溺山嶽不能摧陰陽不能侵虎狼不能毒離奇百折卒能完初志所
以然者親恩不可以生死二天之所助者順也前史載蘇子卿禿節
塞外朱康叔過母秦中裂金石泣鬼神豈不與張孝子異地皆然歟
而年少而機智深沉殆不可及誰當振鐸忽金聲銷下里頑懦之不
立所由來漸矣 讀白鶴堂詩稿跋寄朔風逆行舟懷人傷寂寞卷
展白鶴堂耳目得開廓秋月淨平湖夏雲爭錯落清奇稱體例變化
非一格斯道積彌邱大半由剽掠餽糠未及米鼓腹譚精鑿譬彼鷺
與鳩紛紛噪林壑焉知霄漢間萬里盤鷓鴣窠白襲前人動輒即受
縛嗟余時一吟而以才氣弱南海多明珠此貨莫殫在珍重魚目翁

母饒雜林藁

彭遵泗字啓泉肇洙弟登乾隆丁巳進士第由庶吉士改兵部主事官
至江防同知卓有政績學問淹雅尤長古文生平好著述有蜀碧一書
記明季獻賊入川事確可徵信已采入四庫又有縣志四卷丹溪遺編
二卷蜀故二十七卷又纂蜀苑未成卒

〔蜀碧序〕前史氏丹溪生憶甲申遺事而嘆曰嗟乎自古殘忍之賊亡
甚獻忠遭禍之慘未如明季之蜀之甚者也蜀自獻藩啟封世有令
嗣休養生息幾三百年士民之庶物力之饒甲乎天下其間雖經鄢
藍蘭播之亂元氣未亡也張逆一入勢若摧枯何哉蓋文燦受給於
房穀其銳蓄矣嗣昌督師於荆襄其毒流矣捷春拒諫於石柱其隘
通矣士奇遇糧於守軍其遮撤矣於是陷夔門破涪萬走榮貴敗曾

丹稜縣志卷六

人物上

鄉賢

二五

英血染佛圖炮穴重慶瑞王君臣斬首就戮當是時使蜀藩之志果
於拒賊監軍之餉得請即行其能保有成都乎腹心既裂首目隨之
智者難為之謀矣獨怪獻逆據蜀後僭號稱帝不東扼瞿塘北絕劍
閣收服人心逸休兵士而處心積慮成乎其殺孤奴死雪鯨死貫戲
死剝腹死邊地死士盡矣及匠傭及婦女及僧道及兵卒人盡矣及
犬牛物盡矣又焚其殿碎其砌毀其屋埋其井平其城二年之間骨
積如莽血流成渠雖可望泣諫於刎頸偏裨不忍而自經而賊之逞
毒一日封刃其心不樂也由前言之四方是維天子是毗誰司兵柄
萬死莫贖由後言之天方薦瘥喪亂弘多浩劫之來自宿矣故西
元授首而後又十餘年多門之死不可勝悼矣夫考古之籍推蜀之

由張儀之啟疆公孫之躍馬譙縱之迫脅李特之流亂劉闢之狂孽
王建之發跡知祥之踵據玉珍之叔霸僭王竊帝奪地爭城而皆撫
有蜀民不敢毒荼何獻之肆惡一至此耶龜虎噬人不識好惡獸心
野性固與人殊也論者謂獻逆稱帝蜀人不與誅斬所置守令蓄怨
積怒激而成凶嗚呼此正蜀人之所以死手余兒時稔聞遺老聚談
獻事比長博採羣書並蜀乘所載當時忠臣烈士節女義夫可印證
者彙為蜀碧一編以俟之後是日也慘然操觚悲風四起余壹不知
心之所極淚簌簌而屢下也乙丑年八月朔五泗自序 送順天府
尹顧密齋叙蜀之仕於朝者其先十數人歲有聚月有會特有宴誼
無異姓率以為常近三四年此風渺矣今歲春大京北顧公又以罷

丹稜縣志卷六

人物上

鄉賢

二六

歸送公者方惘然若失而公輟然也慨語泗曰余束髮受書及長足
不出里閭其來京師則公車也中州之行則將命也東南名勝之地
心向往之卒不能至今荷上聖明賜以餘閒吾將東遊齊魯登泰山
望海若沐禮教信義之餘徽吾將南渡淮揚適吳越挹金焦虎邱之
勝覽震澤巨區之雄汎西湖湖蘇白之流風上會稽考秦皇之斷碣
吾將遊豫章躋五老以探鹿洞過潯陽而陟匡廬沂江而上泛赤壁
之風月溯南樓之清景歷荆渚弔楚王章臺之故址入夔門觀公孫
躍馬之遺蹟然後遵巴渝達錦里返吾故廬以終吾事凡吾之歸也
風不帆雨不駕暑不促寒不趨坎止流行隨其所遇凡吾之歸也計
遊歷已耳不計程也計終歲已耳不計日月也泗聞其言而爽然退

而曰嘻有是哉。殆古之所稱大人君子置身局外榮辱得喪不繫於中無往而不適與以視世士大夫汨汨名利之場一遇蹉跌則抑鬱無聊若五官之缺自嫌其身而不能一日容者相去為何如也。公之來也以師席成進士讀中秘書數年擢至京尹名位已盛矣其罷歸也以受過同官所坐亦微淺矣如前所云必有憤懣而不能釋然者而公方感上之德樂身之間遊歷湖山網羅勝槩其胸次擴落豈直吞雲夢者八九而已哉。太史公因行天下勒成史記一書張燕公南還文益奇偉論者以為江山之助公其有意於斯乎。公歸矣天子垂念舊臣如恐不及十數年間屢廢而被起者甚眾他日思公召復用公將以其所作為詩歌者圖之王會傳為盛事則固余之所深望於

公者也。[七夕詩]微涼下秋葉白露沾我裳徘徊侶孤影仰面視穹蒼耿耿銀河脉悠悠去路長我欲駕赤龍乘風叩九閭矯首天衢外鱗爪自飛揚復聞青鳥至促裝待翱翔仙客為予言往來雲之鄉已矣且休歸百感出中腸生死胡為耳別離多慘傷生離會有期死別杳無方借問牛女星何如參與商。[題某翁釣圖]浩浩乾坤無械杵慚負世人掉臂走漁家收入水雲鄉青笠綠蓑煙岸柳有客高歌滄浪來欲往從之平分取飄然小艇出蒹葭赤足科頭釣清瀏就中雅蓄最可人一琴一帙一茶白釣罷撫絃絃罷書爐煙裊裊散江菰元貞一逝近千年流水桃花如芻狗蟻子羣中空茫茫何日風波不濡首長嘯一聲島門煙瀟灑餘生脫紛糾我欲剪取半幅圖日坐晴川

對此更 [過武侯祠吊昭烈] 荆門遙撤漢宮牆老後雲旗出益方王
氣夜收明月峽賊星前耀紫髯王千年風雨園陵閉一代君臣俎豆
長自是吞吳遺恨失不勝幽怨滿江湘 [吊武侯祠] 陰森古柏露華
滋過客頻尋三絕碑碧草黃鸝空此地綸巾羽扇憶當時星流渭北
矢精散淚斷秦川父老思日暮瀟瀟南浦上靈風猶是載征旗 [吊
北地王] 摩天險割劍關存一旅潛驅至國門歸命箋成來太史殘家
力竭哭王孫武擔不斷長宏碧洛下誰招杜宇魂頻過昔年孤憤處
惠陵風雨動黃昏 [吊諸葛督軍父子] 重器還移孝作忠牧兒策失
瑯琊工旄頭影落涪江月綿谷聲寒白晝風三顧主情留似續一家
臣節淚英雄銅駝幾許埋荆棘尚倚園陵恨不窮 [送杜水部旅櫬

丹稜縣志卷六

人物上

鄉賢

二八

[還蜀忠州] 去去銘旌入望低夔門直指薊門西十年薄宦同鷄肋萬
里悲風促馬蹄柳拂黃塵朝蔽日雨寒春樹夜啼鶯欲知此後傷君

處酌酒藤山 忠州名 認墓題

彭端澂字子徹性倜儻少讀書畧觀大意不肯竟其學然聰穎絕人年
三十舉於鄉出宰山東棲霞縣為政勤恪會邑蝗蝻率役急捕令吏攜
訟牒與俱至村墟間值訟者即止樹下為剖白曲直蝗滅而訟亦清居
官之勤類如此嗣以丁母艱去任服闋補黃安縣知縣善捕盜邑無吠
犬民咸頌之先是端澂以事忤大府大府銜之陰使人伺其過使三反
無有也後飾詞誣劾端澂去官日民送者以萬計有號泣者其感人如
是端澂負其才以罷官非罪鬱鬱不得志每狂飲無度歸里逾年卒後

齊楚間人思其德猶違違蘇道不置

李昶元號竹山幼穎異十二學為文蒙邑令高士魁洪雅張霞泉賞識
召致門下弱冠入膠庠咸豐己卯舉於鄉聯捷成進士分工部主事告
終養回藉悼母棄世早未獲祿養乃家居侍父不遠出明年父卒旋遭
蜀亂厯主治官婆日漢嘉講席造士尤多戊辰點撫曾璧先函召襄贊
軍務叙功保直隸州留點補用庚午檄署涪潭縣履任後倡修城垣衙
署功未竣調點西州士庶攀留不果往適苗匪糾萬餘人作亂遂招募
團勇請兵大府禦之再調開州甕安施秉餘慶四州縣鄉兵秘授機宜
擒首逆張占元斬之招撫餘黨涓遂平壬申秋赴鎮甯州本任時回匪
肆擾官兵勦新城昶元辦防堵盤獲賊首保文海八人官兵擁眾來奪

丹稜縣志卷六

人物上

鄉賢

二九

勢甚洶洶猝斬之咸散去賊據扁担山為老巢以竹子壘為門戶周軍
門駐州勦辦因地險壘堅圍四月不下昶元曰是不可以力取當以義
動之帥百餘人親入賊巢開諭百端任三日調為首十餘人下山隨遣
官兵乘勢焚其巢擒偽國師王陽德勦撫兼施八閱月而回匪平叙功
以知府用請咨引見回川道憲曾及岑林二宮保屢函召致以老辭不
復出在黔為政以教養為先所至有聲漢苗悉愛戴之歸老林泉以吟
咏自樂著有修竹山房詩草行世

陳燦修竹山房詩序同治己巳秋點中補行己未辛酉壬戌科燦中
式胞弟琅領解皆出丹稜李竹山先生房薦是非與先生有文字緣
而能若是乎先生以名進士分職部曹即乞養歸時論避之嗣曾文

誠公撫黔風重先生文章經濟奏調來黔屢襄較鄉闈所得皆樸學之士旋任鎮甯州牧愛士愛民惠政流傳卓卓稱循良最都人士至今稱道弗衰中丞黎文肅公刊黔南三書院課藝以先生司選事所選燦兄弟文尤多信乎與先生有文字緣良不誣也先生宦情素淡由黔解組歸娛志林泉潛心講學日孳孳於訓子課孫不復作出山計性嗜吟咏興之所至輒以著於詩先生哲嗣幼竹刺史刻其修竹山房詩集寄甘井嚮為之序燦謹受而讀之竊謂先生性情高曠故詩中有清靈圓妙超然於塵埃之外者性情豪逸故詩中有跌宕雄奇高歌唱月長嘯凌雲者至其性情之深厚則凡感時憂民諸作懷人贈友諸篇又復慷慨悽惋悱惻纏綿有可歌可泣足以沁人心脾

丹稜縣志卷六

人物上

鄉賢

三〇

者古人謂詩以道性情先生讀船山詩集有句云傳人詩萬首都自性情來燦於先生詩亦云後之人讀其詩者即先生之性情亦可於諷詠間得之而不徒規規於尋行數墨斯可為善讀先生之詩矣燦自維譚陋白首邊陲濫厠監司碌碌無所建樹不足副先生之知遇四十年來回首師門感喟何如而猶得於隴上風雪中讀先生之詩序先生之詩愈信與先生之有文字緣始終為不虛也宣統元年孟冬陳燦序

題海棠花 春風萬里來山岡吹開幾株古海棠炫如仙子披霞裳手捧紅雲下大荒我來看花當朝陽香霧空濛籠山莊一枝兩枝意洋洋臨風舞笑欲狂天心特放春晝長故為流連醉一觴杯盤衣袖俱芬芳愛花心重轉傍徨名花胡來白雲鄉不植金屋

與玉堂美人名士共徜徉
花兮花兮亦何傷
托身清高氣昂昂
任從塵世日滄桑
我有心花燦文章
肝膽熊羆吐奇香
化為劍氣生光芒
飛入東南大戰場
殺人風利不可當
血戰淋漓如花光
吁嗟乎血戰淋漓如花光
朝來傳呼熟黃梁
辛亥元日題瑞牡丹
瑤臺初放一枝香
鎖袖人間富貴場
紅粉半酣名士酒
黛痕新試美人粧
共憐嬌質宜金屋
自有芳名到玉堂
十二欄杆圍錦繡
春城深處奉花王
不須羯鼓兩三催
直向東風頂上來
隨意自鋪花世界
置身常在玉樓臺
芳心夙擅無雙品
春色今爭第一回
未許羣英誇艷麗
高枝齊傍五雲開
雕欄曲曲燦流霞
照眼紅綃入望賒
瓊樹合教仙佛種
玉人爭寵帝王家
一生消受春風福
滿院鮮明曉日華
料得芳神應

丹稜縣志卷六

人物上

鄉賢

三一

有意年來富貴兆於花
誰將玉樹抹胭脂
翠萼含芳半吐時
未免有情嬌欲語
宛從相對笑生姿
淡雲微雨滋培養
寵柳名花共護持
最是一番風過處
清香吹滿鳳凰池
題友人畫花才人遊戲亦文章
落落疎疎三兩行
此樹隨時能出色
有花開處即生香
綠垂青眼窺流水
紅點丹心抱太陽
著紙春風來腕下
好憑彩筆贊東皇
即景寂寞空山一夜霜
繞庭古木醉斜陽
天然畫出新詩品
落葉蕭蕭已半林
斜陽漏處黑雲蟠
釀雪風生陣陣寒
吹得清香滿庭宇
款冬花影覆欄杆
蒼崖翠壁野人家
新放寒梅幾點花
古幹倒垂籬落影
果然竹外一枝斜
朔風吹起石門關
煙霧濛濛直上山
漸近虛空漸濃厚
化為霖雨自飛還
晚歸山中平沙看落日
獨行上翠

微草徑穿林麓時聞木葉飛清風來何處梅花香襲衣相伴惟新月
一鈞影依依步入茅檐下白雲先我歸

羅驥字承之係廣元教諭羅挺秀之孫幼隨父瑞菴讀書學解有大志
入邑庠寄居成都就成都蒼溪榮縣幕司書記因辦省城團防有功保
舉訓導同治二年蔣少園觀察重其才招赴陝西司筆札旋奉劉中丞
調參軍務收復漢南保知縣嗣以攻勦蔡啟各逆克復階州附片奏保
留陝補用後因勦滅捻回叙功保同知九年六月署鳳翔通賊至多方
守禦力保危城事平調署甯羗州補褒城縣所至重蠶桑興水利民懷
其德謂其桑曰羅公桑謂其堰曰羅公堰光緒元年調長安左宮保邵
撫臺俱以羅青天呼之尋保候補同知以知府用二年拔補南鄭時值

丹稜縣志卷六

人物上

鄉賢

三二

荒旱饑民遍野設法賑救民賴以安俸滿開缺告歸修墓回丹步行入
城樸素如寒士居二年卒墓葬羅溝煙墩山

文苑

宋

李奎宋史李燾傳子奎字叔厘夔州路提點刑獄常以常璩華陽國志漫漶散佚搜考訂正重刻而序行之

〔重刊華陽國志序〕古者封建五等諸國皆有史以記事後世罷封建為郡縣然亦必有圖志以具述蓋以疆域既殊風俗各異山川有險要阨塞之當備郡邑有廢置割隸之不常至於一士之行一民之謠皆有不可沒者顧非筆之於書則不傳也周官職方氏掌天下之地輿辨其邦國都鄙夸蠻閩貉五戎六翟之人民與其財用之數要至於九穀之所宜六畜之所產亦未嘗不佔畢而記其詳况夫環數千

丹稜縣志卷六

人物上

文苑

三三

里之地分城置邑殆踰數十中間特異事變往往裂為偏方霸國其理亂得失蓋有繫天下大數安可使放絕而無聞乎此晉常璩華陽國志之作所以有補於史家者流也予嘗攷其書部分區別各有條理其指歸有三焉首述巴蜀漢中南中之風土次列公孫述劉二牧蜀二主之興廢及晉太康之混一以迄於特雄壽勢之僭竊繼之以兩漢以來先後賢人梁益甯三州士女總讚序志終焉就其三者之間於一方人物尤深致意雖侏離之氓賤俚之婦苟有可取在所不棄此尤足以弘宣風教使善惡知所懲勸豈但屑屑於山川物產以資廣見異聞而已乎本朝元豐間呂汲公守成都嘗刊是書以廣其傳而載襍荒忽刊缺愈多觀者莫曉所謂余每患此久矣假守臨邛

官居有暇蓋嘗博訪善本以證其誤而莫之或得因撫兩漢史陳壽
蜀書益部者舊傳互相參訂以決所疑凡一事而先後失序本末舛
逆者則考而正之一意而詞旨重複句讀雜錯考則刊而去之設或
字誤而文理明白者則因而全之其他旁搜遠取求通文義者又非
一端凡此皆有明驗可信不誣者若其無所考據則亦不敢臆決姑
闕之以俟能者然較以舊本之訛謬大畧十得五六矣鈔本既具報
序所以冠於篇首好古博雅與我同志者願無以夏五郭公之義而
律之嘉泰甲子季夏朔丹稜李丞叔厘甫謹序

唐輅字德輿文若子聰慧能文嘗進德壽宮慶古賦後省第八甲等乾
道中出大理寺直通判漢州淳熙十三年冬提轄權貨務高宗上仙獻

丹稜縣志卷六

人物上

文苑

三四

噴議論稱祖破禮官之說又及巷市七日事孝宗下其議會御史察洪
翰林邁議稱祖非是洪家居待罪孝宗曰議禮如聚訟何嫌異同於是
禮官並疏輅失言給事乞罷輅復判隆興府旋為利州守周益公謂嘗
與立夫同僚相善文士子孫能世其家如唐氏者未易多得
李塾文簡公第四子兄屋中制科近臣復舉塾賢良方正南士多嫉之
近習貴璫亦恐制策之或攻已也共沮止之上賜束帛罷歸後官至承
務郎

彭叔融字百川世為邑人魏了翁嘗稱之著太平治迹統類七十三卷
陳振孫曰百川畧用袁樞通鑑本末條例為前集四十卷中興後事為
後集三十三卷了翁誌其父墓後云彭君飭身嗜學卒老韋布百川之

通曉當有以卒其志者

邑人彭遵泗懷布衣叔融詩吾家有子雲嗜學老輩布治迹銘古今
七十三函足干鏌氣不埋流散悲風雨張雷起振孫拭光發塵錮亦
有鶴山翁封竈憐微誤祇今文獻存誰為踐其祚

史孟傳據鶴山集丹稜史孟傳守道既奏名將入對忽以疾卒詔附劉
涓榜賜同進士出身授廸功郎致仕撰書畧十卷

清

三楊雨村詩話人皆知丹稜有三彭而不知先有三楊一楊岱字東子
康熙丙午舉人有邨山集一楊岐字周子有碧羅亭集一楊崑字葛山
有三樹堂集皆以詩名東子名句如送孫默云野水斜春磴孤猿啼向

丹稜縣志卷六

人物上

文苑

三五

人大慈寺青苔荒石馬昏月宿寒鴉句極幽險又夜泊二絕云夜船將
泊棹歌齊芳草萋萋野路迷只有斷猿無宿處最高枝上徹明啼拍隄
春水四無涯吹笛樓邊起暮鴉舊寺僧殘江樹盡空留寒月老蘆花讀
之淒楚欲絕周子雪詩云遠塞孤城沒空山樹影寒葛山雨中看荷云
細雨低雙鷺微風咽一蟬亦體物之工者三彭以科名顯而三楊僅一
孝廉故人多不傳其實能詩不係名也世有能詩而不第者豈少哉
彭蕙芝字樹百號田橋生而奇穎博涉經史尤工于詩為諸生已負重
名乾隆乙卯舉優貢入都就京兆試還時秦蜀間為教匪蹂躪兵燹甫
靖蕙芝券驢入棧撫時感事悽愴悲哀作棧行雜詩三十首世多傳誦
庚申舉于鄉至京紀尚書昉異之延館於家未幾以疾卒年僅四十餘

未得展其志士論惜之著有鷗夢軒詩集十二卷

附[字藏銘]

在高橋鄉

字藏不知所昉於書無可攷惟世傳功過錄中載

宋人惜字故實意權輿於是也昔成周之世有外史掌達書名於四方九歲則大行人屬瞽史諭書名記曰書同文破壞六書者罪且與畔禮亂樂等古聖人於文字間慎重若是使睹後世筆札之濫棄擲之與必惻然而思為之所矣是則字藏之設不必規古實深得古人之意者也藏也者藏也携箒篋中物納而燔之燼不飄灰不溢是無盡藏也故惜字莫善於置藏近代以來在所不之而結構完固蜀尤稱勝茲邑諸君子家於此者一旦慨然勦事乃集議釀賞鳩工輦石擇康莊爽塏之地而成之不棄謏陋以銘見委乃為之銘曰汲之家

丹稜縣志卷六

人物上

文苑

三六

孔之壁有時毀鑿遺簡出曷若今茲甃貞石外隋中甃火內絕化字形模斂字魄歸諸烏有匪隨劫弗泐弗圯永貞吉

稜行三十首雲

棧初歸第一程還家憶得別家情空懷壯志仍今日應被青山笑此行風雪滿衣慈母線茄鉦動野亞夫營何堪回首京華任虛負三年

抵半生 哀柳飄蕭古鳳州重重山翠歷城頭地傳舊產誇三絕我

坐清宵咏四愁戰士馳驅戈影亂美人零散粉香留憶誰開道通行

旅肯許豺狼過嶺遊 古木蕭森曉霧寒峯巒婉孌秀堪餐學仙原

較知兵易入道何如佐主難成敗意甯偏楚漢恩仇心已自秦韓論

功三傑公為最卻怪辭封受彈丸

紫柏山張子房辟穀處

道路傳聞諒有

因謫言已可戒行人欲增壯色須聯伴不在戎行合愛身戊午有時

眠破幕難民幾處爨遺薪朝廷已鑄封侯印祇待紅旗一騎塵
人
觸寒風濕霧來西行一步一崔嵬杜鵑哀怨猶啼血棧道燒殘有積
仄漢鼎曾憑三傑定蜀關轉恨五丁開行行又過這七處幾度躊躇
憶將才 山凹幾處起炊烟竄鳥驚猿命共延賊口有辭讎墨吏民
生無計哭青天郊原戰鬼添新舊帷幕機謀積歲年計日如應銷殺
運福星曾見守全川八月廿四日廷訊王三槐 打色行脚不如僧
石磴紆迴怯萬層險步徐攀舒馬困捷登斂手讓人能命逢劫運輕
良賤心痒窮途失愛憎癡絕書生能達化征衣不剪碎兵繒 居民
罹害指刀瘢瓦礫焚餘一望間久享太平誰慮盜暫留殘息轉開顏
水聲流恨喧孤澗雲氣含愁復破關倘有富人思助餉賊來切莫毀

丹稜縣志卷六

人物上

文苑

三七

銅山 覓得藍輿偏仄乘差堪託命度峻增身輕未許同飛鳥氣載
真憐比凍蠅入世升沉應有定失時勞逸笑無憑晏安他日逢人戒
憂患餘生記此曹 何必期門與欣飛一朝釋耒助軍威毒深焚掠

須清野計感逋逃更合圍安土百年皆帝力同仇眾志即兵機共為

蒼赤分良莠動靜因心辨甚微沿連鄉 峻峭危關氣象尊崎嶇已

歷幾朝昏鳥音迎客通鄉語山勢隨人入店門倚劍聊將防暴客啣
杯且復覓吟魂更聽僕圍圍爐坐又說前途萬竈屯 高隱遺蹤仰

漢賢白雲何處舊時田山通褒谷兼斜谷水瀉廉泉與讓泉當世共
傳辭聘事何人親著問神篇無端失節諛新莽相較真堪一嘔然

戈戟森排雉堞周孤城秦蜀扼咽喉憑山列柵唇為齒背水連營尾

應頭烽火尚傳褒女笑陣雲猶壓漢軍愁即看守禦真嚴備端賴賢
能百里侯題褒城縣望裏驚傷舌欲噤是何城郭氣蕭森山荒猛虎時

滋孽地瘠甘棠不布陰倉猝兵戈民命賤尋常耕鑿聖恩深憂時無
怪書生妄獨向風前淚濕襟誰從虎帳勸加餐未得功成死亦難

空見將軍屍裹草幾聞元孽首梟竿血濡金甲藏來碧箭避天狼歛
入蘭猿鶴蟲沙輕化去忠魂含淚到長安途中遇陣亡諸將之柩秦棧才

過蜀棧通雲峯苔壁闢從龍艱難路接青天外出没人浮翠浪中心
被火驚翻覺定身逢奇境更須窮試嘗村店龍芽味乍可鄉愁一洗
空五丁開鑿百牢關亂石巉巖步怯攀日影分穿峯向背人家雜
繞澗彎環磴田種麥寒煙裏閣道傳烽積雪間聞說妖聲驚黑夜鬼

丹稜縣志卷六

人物上

文苑

三八

車鼓翅過前山雲深月黑頻聞警三百山程倍道過靜比啣枚聲
不語暗逢椒夜互相訶人穿虎豹叢中健鬼嘯氏羌窟裏多膽壯還
思磨盾鼻生擒梟獍唱鏡歌尊前我愛客欽崎兵法由來不授師

儒將何妨施面具文人安用握毛錐能騎生馬真成癖欲請長纓却
解頤莫道空談惟紙上陰符能熟尚非癡贈夏赤城七盤關險亂雲遮

移步書碑戒莫差文石道旁摩錦繡荒坪雲際隱龍蛇久依良友志
行役雖聽鄉音喜近家分送寒風香一路轎簷掛得野梅花得得

蓋與不憚勤行穿鳥道趁斜曛土風秦蜀居民雜地氣寒溫隔嶺分
達寺僧眠千嶂雪暮林樵荷一肩雲長途游子歸期近先報家人託

雁羣錦衣歸省艷同行一路閭閻目覩詳官具人心徐議政民培

元氣善投方談言已足窺才識藉手寧教易素常信是鸞栖無擇木
總看枳棘變甘棠贈孫明府 雄關聳峙指朝天闕下波光好放船地合
葭萌當一壁路分梓利衛三川青山幾閱兵戈代白鳥誰盟浩蕩緣
他日浮家任來往捕魚還過此江邊 風塵凋敝鷓鴣裘羸得林巒
望裏收山縣清貧城不潤鄉雲蒼莽暮生愁雁飛汾水歌才子鶴去
江城弔敬侯萬里歸來休計日馬頭雨見月如鉤 崔魏門戶衛堂
皇漫說安危地險長運謝難憑雙劍插時清何用一天當空聞召主
成新讖幾見降王受故鄉策馬凌空飄瞥過回頭閣影黑雲藏題劍
昭化東來劍閣西峯巒到此別呈奇文心人漫勞千想匠手天難恐
再施收卷欲成屏障小勾留屢囑筍輿遲幾回注目經時看牢記胸

丹稜縣志卷六

人物上

文苑

三九

中待補詩

人生泥雪歎飛鴻破曉停鞭古驛中下坂片雲輕墮地

推窗羣岫翠浮空文章海內懷兄弟鬢髮燈前足雨風觸我人琴無

限恨壁間未忍拂紗籠

船山有武運聽雨圖今壁間猶有詩

荒荒戎馬訴風塵不

死扶持或有神即事成詩多險語得錢隨手贈饑民衣沾山翠長留

潤路折梅花欲寄春遙憶京華諸酒伴消寒應念遠歸人 田園屋

舍簇林坳合讓居人笑容勞農趁餘閒紛嫁娶市爭新歲聚錢刀負

暄老叟依簷暖擊堵兒童逐隊罵何事東民偏劫會哀鴻十萬尚嗷

嗷 忽逢空濶倍開顏出棧人勤馬亦閒未信近家餘咫尺尚拚遠

道任閒關筆痕染得羣峯綠詩卷留將宿酒斑悵望京華依北斗那

堪回首謝雲山

韓兆瑞號鵠山性至孝晨夕不離親側而學業日進試屢冠軍嘉慶壬午舉於鄉後司鐸綦江隆學校建考棚伍氏弟兄連取高第皆其教也告歸後足不履城市以壽終著有南平閒詠鵠山文集

邑令胡子材題鵠山詩草再三披覽欲瞻韓手盥薔薇露未乾門下諸生工組織都緣老杜擅詩壇

翟敬止號熙堂博學能文有器識奉親孝事兄恭待弟友藹然一堂弱冠後蜚聲庠序嘉慶己卯領鄉薦主講大雅書院佳士多出其門丙戌北上大挑二等授江津教諭後致仕以壽終

聞叛兵攻儻城廣文罵賊被害詩洋州見說擾旗槍罵賊明倫學博亡泮水藻芹空寂寞緇林風雨轉悲涼驚天壯烈鬼神泣貫日丹心

丹稜縣志卷六

人物上

文苑

四。

姓字香定識精忠魂不散持戈效命在沙場

翟敬笏字柱山髫齡好學善屬文尤喜吟咏弱冠馳聲黌序二十七歲登選拔遊幕成都什邡彭達等縣十餘年歸里後邑宰聘主講巽崖書院二十三載品行學問為士林所推重年六十四卒著有白雪堂詩稿一卷

附 洪雅教諭李廷錫白雪堂詩稿序蜀南丹稜舊齊樂地有宋李燾

唐庚父子前清彭氏端淑肇洙遵泗弟兄馳聲翰苑輝映後先世傳眉山三蘇以丹之七李三彭並舉一時人才之盛鄰封罕匹殆西蜀名區也山川鍾孕代產賢豪意其間必有高人逸士步武前哲以發問氣之英先心儀其地者久之光緒丁酉司鐸洪雅改革後因家焉

丹於洪家通季子事商業托塵居得以長相往還與郡人士流連觴詠悉其地人文接踵至今未艾科第宦蹟崔宿李羅增輝志乘叢讀李竹山太守修竹山房詩未嘗不歎其才之逸而政之美初不料風騷嗣響代不乏人蘊玉含珠猶有輝媚山川者存矣今年秋適丹稜瞿子正模積學士論文數載出其先祖柱山先生古今體詩一卷示錫謀付梓為乞弁言於簡端受而讀之風韻體格進步船山子才與修竹山房相頡頏大都感舊懷人寄情禽魚花木以抒其排惻纏綿之意蓋有得於溫柔敦厚之旨焉是不可以不傳先生以道光乙酉膺選拔鄉試屢薦不售遊幕什邡成都彭達等縣當時士大夫咸欽其學而惜時命之不偶掌教本邑巽崖書院廿餘年造就人才凡知

丹稜縣志卷六

人物上

文苑

四一

名士胥出其門而尤敦行孝友里閭至今奉為典型文章著作其餘事也錫生也晚未獲執鞭以從幸窺先生遺編并喜正模之能繼祖武揚先芬以彰鍾毓秀靈也是為序

〔相如琴臺〕一曲求凰寄託深

相如當日解調琴猶思獻賦凌雲去空有荒臺伴月臨桃竹檀花名士宅玉徽瑤軫美人心題橋曾記揮絃手流水高山憶好音

〔客寓資中將圖北上留別諸友〕

唱到驪歌淚滿襟低徊慰藉故人心可邀

綠竹林中客且聽焦桐爨下音峭壁雲梯隨月上珠江錦浪索詩吟

揚鞭重步燕臺路落葉蕭蕭雜暮砧

〔明妃出塞〕

萬里胡塵恨別離

吹笳鼓角淚低垂紅顏命薄令如此不怨君王怨畫師

君王恩重妾身輕馬上琵琶訴別情縱使畫圖工點綴今朝難免嫁胡城

代江山伏玉顏雁門此去懾諸蠻黃金若把蛾眉贖不羨文姬返故
關
〔潯陽琵琶〕送別潯陽月滿舟荻花楓葉晚江頭青衫淚落緣何
事一曲琵琶攪客愁 學得明妃出塞聲曲終偏動別離情而今打
槳潯陽渡猶剩秋江夜月明
〔秋夜感懷〕秋風秋雨亂三更獨坐蕭
齋百感生愁到萱闈承色笑年來遊子誤功名青燈挑盡眠難穩黃
卷開時誦不成最是官衙人靜後樓頭金鼓一聲聲 浪跡浮生十
二年秋風一度一嫣然依人門戶逃禪法放眼河山折桂天不擲屠
刀難學佛能耐書債便登仙梧桐葉落根盤固來歲春回雨露鮮
瞿崇道字斗山邑廩生才高學博尤長於詩清新雅雋為學使所器重
惜志未遂卒

丹稜縣志卷六

人物上

文苑

四二

〔詠梅詩〕悵望東皇意正牽尋芳幾度陟山巔忽驚臘盡三冬候捷報
春回十月先清意恰從驢背訪佳音遙自隴頭傳封姨不肯遲消息
冒雪衝寒到竹邊 梅信

策杖騎驢踏綠叢誰將萬斛贖仙風斷橋
流水孤山外薄靄輕雲細雨中漏洩月魂雙袖碧勾留香夢一燈紅
芳馨竚待和羹用不比凡葩服媚同 梅香

重重疊疊映柴門喚起
梨雲夜色昏斜倚玉樓寒有韻倦臨苔石冷無言蕭疎籬落風移迹
清淺池塘水映痕莫使呼童和雪掃橫斜留待一樽論 梅影

艷冶

何如淡素宜肯隨紅紫鬪新奇參差驛路雲千疊冷淡溪橋月一枝
色映羅浮春到早光流鄧尉雪消遲幾生修得清高品我欲巡檐索
笑之 梅華

〔聽月樓詩〕

百尺樓高接太清憑欄側耳甚分明碾空

軋冰輪响搗藥叮嚀玉杵鳴樂奏廣寒音嫋嫋斧裁丹桂韻丁丁陡
然一陣清風起吹落嫦娥笑語聲

羅錫忠字春帆邑拔貢以州判補用設帳於洪門墻甚盛性好學工詩
然散佚頗多畧存梗概以見一斑

庚申八月十六間賊破丹稜斗轉參橫夜向闌驚聞羣醜入南安江
城隱約鳴宵柝村舍蕭條作曉寒喚起兒童魂欲斷回思閭里淚輕
彈生平不解離鄉苦行路于今始覺難 辛酉九月滇匪重到丹稜
避亂後山羣盜如毛耐戰爭凌晨擾擾入空城科頭跣足官先遁斷
髮文身勇亦驚盡棄戈矛揮汗走遙聞金鼓隔山鳴倉皇直到林深
處一抹寒煙曉露明 賊去後入城曉煙初散帶愁來四望令人聽

丹稜縣志卷六

人物上

文苑

四三

八哀草木芟夷山盡兀田園荒廢路新開萬間廣廈餘焦土一片孤
城剩劫灰日暮天寒聞野哭安危深愧濟時才 閨賊營婦女流離

失所薄命紅顏淚似麻即今流滯在天涯飄搖異地風中絮零落窮

途雨後花阿母別來應有夢故園歸去已無家珠沉玉碎情誰訴木

脫山空日易斜 瓶梅疎影寒香不染塵案頭斜供一枝春清癯酷

似長吟客淪落渾如太古人紙閣得伊為春屬磁瓶添水養精神何

須更道孤山好伴我蕭閒物外身 鸚鵡空庭相對兩依依惜汝樊

籠瘁綠衣只以能言常被束未容寂寞可思歸寒憐昨夜新霜重夢

逐空山舊侶飛爭似秋風鳴羽健為儀雲路有光輝

徐浴德字香泉幼穎異長博涉經史尤工詩清咸豐時諸生屢戰棘闈

不售遂隱居教授於邑東小花溪築草堂於溪上顏曰白鹿閣則評章
花月讀書鳴琴其間晚年輯生平吟咏著雲林館詩鈔一卷溪館小草
一卷繡堂帝王圖一卷眉丹鄉賢傳一卷讀史雜記二卷

〔白鹿堂雜詩〕鎮日無人叩竹扉邇來漸與俗情違不因待月眠窗早
除却栽花事亦稀北苑詩成聽鳥和西窗琴駐看雲飛眼前何物非
真諦一片鳶魚盡化機 當年仗劍學孫吳聚米常陳破敵圖零雨
出山欣遇主大風擊筑恥為儒人無勁節非君子士有剛腸是丈夫
自分奢懷難遽了教兒讀盡五車書 〔遊大佛寺〕天外丹梯遠石梁
數重樓閣露紅牆穿林霧密衣猶溼夾道花繁屨帶香門掩慈雲臨
水竹園栽野菜雜山薑不知去路看來路免與僧寮話短長 〔三蘇

丹稜縣志卷六

人物上

文苑

四四

祠懷古 立朝大節本無隣散地長為放逐身萬里岷峨悲故國五年
煙瘴泣孤臣舉家竄嶺交遊絕即事成詩諷諫真此老胸中無別物
時宜多不合斯人 〔古寺〕清溪流小橋斜廢寺無僧鳥自譁樹覆

簷牙藤作瓦苔縈碑版字生花杖藜父老閒垂釣關草兒童學種瓜
路轉山腰聞犬吠竹林深處有人家 〔遊義眉山〕雄心百折不成灰

頃刻天光變幾回山下清明山上雨行人脚底一聲雷 〔息心所戲

題睡佛〕浪說山中佛有靈諸天花雨渺無形十年悔作邯鄲夢不料
如來尚未醒 〔秋夜即事〕隴畔流螢錯落飛山僧送我納涼歸臨行

貪看花溪月不覺虹橋露溼衣 〔咏蠶〕一籃桑柘露生香看到三眠

自異常莫謂春蠶為物小老來滿腹是文章 〔漁父〕小艇疾搖天欲

暮獨向蘆中深處宿款乃一聲不見人一片蓼花紅簇簇

溪居雨

餘黃鳥四山啼春漲俄添綠滿溪坐看花邊小漁艇一時撐進板橋西

西樓晚眺夕陽紅過碧峯巔丹鳳樓西畫角傳萬頃松濤晴帶

雨一鉤蘿月晚生煙山從高處爭投鳥浪到平時欲拍天笑把欄杆

頻起舞梯雲莫謂竟無緣

讀史有感血戰河山殺伐張驚魂猶繞

舊邊疆徒聞兔死終烹狗幾見侯封到牧羊志士功成休戀闕高人

名遂合還鄉南陽畢竟歸耕否枉作隆中夢一場

齊肇璜字錦帆一字醒凡邑明經少篤學聰穎過人經史百家無不瀏覽為文秀拔名噪一時家窘舌耕循循善誘登門墻者率多顯達生平喜酒工詩邑宰賀祝堯聘主西席為風雅交旋調署廣元強與行客中

丹稜縣志卷六

人物上

文苑

四五

唱和尤多年餘始歸母老不復遠遊仍業硯田供甘旨事親以孝聞兄弟相友愛俄改科舉延任高小學校教員學子受益頗多尋因革命軍起決意歸田怡情花鳥發為咏歌年七十卒於家著有丹稜鄉土志二卷耕道齋詩草三卷

詠史詩何物龍犀種禍胎天生妖艷自褒來六宮見妒無顏色百媚

工讒可殺才烽火何如兵火烈笑聲未竟哭聲哀不堪回首驪山下

紅玉柔肌碧血埋褒姒九閭宮殿耀庭燎萬國衣冠趁早朝王意

未忘情一片妾身已負罪千條不甘同夢蠅聲亂敢殫行雲燕語嬌

晉珥却殘歸永巷千秋彤史美名標姜后歌舞迷樓動粉塵空度

大鳥息三春舉朝唯諾誰佳士一諫分明讓美人海畔餘金絲以相

漢陽垣啟霸圖新莽家多少如花貌爭似樊姬慧絕倫樊姬 若耶
溪畔浣紗人一入深宮便貴新恩愛纔專吳國寵仇讐已洩越王瞋
水犀勢敗軍容墨金虎光消霸業淪慘絕姑蘇臺百尺頽教麋鹿走
荒榛西施 國破家亡殉節秋息媯何事負君侯必妃有意留香枕
石妾無心殞玉樓不語三年終足矯猶生二子竟志仇夫人本是桃
花性輕薄春風逐水流息夫人 南山有鳥北山羅鳥自高飛羅奈
何妾本寒微心不改王雖富貴志無佗願從地下隨夫子肯逐宮中
作女娥試上青陵臺上望相思樹子鬱交柯 韓馮妻 君子竹曾聞
有斐比淇竹君子誰知即此君勁節自饒能傲雪虛心有志欲凌雲
七賢體度超凡品六逸風流絕類羣合使葛蒲甘下拜亭亭獨立謝

丹稜縣志卷六

人物上

文苑

四六

塵氛 天夫松 生平原自淡繁華偏愛大夫寵位加臣節有心凋在
後貞柯不改玉無瑕肯將爵命邀秦賞未許將軍號漢家腹上若教
丁固夢三公十八貴無涯 高士柳 翠旗亭柳綠凝煙中有高人絕
俗緣逸志陶潛情欲淡丰神張緒美如仙先生種合栽門右處士偏
宜植徑邊却笑蘇臺烟雨裡徒將金粉鬥春妍 美人蕉 不簪不珥
不華鉛彼美何來妙欲仙有色亭亭青袖舞多心縷縷碧絲牽莫將
麗質藏金屋合貯阿嬌在綠天堪笑樵人塵俗客空迷鹿夢誤因緣
天雄關懷古 天雄云是古牛頭憑弔人來獨倚樓疆宇昔歸劉後
主戰功今紀漢桓侯 桓侯屯 兵處 屯 山圍昭化孤城峙水繞嘉陵一綫流興
廢幾回傷往事重關依舊壓神州 過須家河 江路平沙軟山場曉

市開風翻黃葉下人語白雲堆炭竇分深淺煤船共往來村醪香正
熟沽飲暫徘徊 [吊惠陵] 藉得西川業孫曹取次圖天胡不祚漢討
恨失吞吳竟遂黃初志空遺白帝孤巍然一坏土蒿草只荒蕪

